

# Poerkerzaoterdaag

Poerkerzaoterdaag 9 febr. 2013



**4x11 jaor bestaon** beteikent in de vastelaoveswaereld 'n jubileum.

Volges de sirremoniemeister waar de **Poerkeroptoch** dit jaor daorum extra kleurriék en de schoeênste tot noow toe.

Jao, die sirremoniemeisters kinne 't altiéd leuk bringe. Of hae geliek had weit ik neet want ik had gennen tiéd um te kieke.



Det kump umdet we met 'n stel Rapidominse bezig ware **Zalzershaof** startklaor te make veur de **dorstige optochgengers en optochkiékers**.

Want as se 'n paar oor in d'n ozel hebs gestaon geis se toch effe nao "de zaal" um dich op te werme en 'n lekker pilske te pakke.

D'r kwame groepe binne met prachtige pekskes aan en schoeën geschmienkte snoete.

De kleinste jeug ging alves op 't podium speule, dao kóste de elders eur kroeës good in de gate halde.

De meziék woort lanksamerhand harder gezatte.

De tieneraafdeiling zoot of hóng in de gangk taeye de moor te **chille**.

De geis toch neet beej "**die alde**" staon in de zaal.....**chille** duis se met vrinde, neet met dien elders!

Op de parkierplaats stónd 'n groeëte tent maar vuuel lóchtig gekleide gaste ginge lever nao de zaal

um te veurkómme det ze zóndaags al met griep in bed loge.

Taeye 3 oor begóste we de bar en de íeskas in orde te make.

't Leep neet allemaol aeve soepel want in 't begin hadde we gen speelwater.

'n Koppelslang spróng telkes van de houfslang aaf en tot euvermaat van ramp kreeg de íeskas in de loup van den aovend kure.

Tot 3 kiér toe dónderde de schape volgelaaje met flesse nao ónder.



'ne **Schoeën verkleide manskaerel** bestelde zich beej mich vruug in den aovend 'n **dafje en 'ne diesel**.

Ik zei taegen um; "Mósse dan neet nao de garage of tankstatión".

Hae keek mich aan wie 'ne boetsauto en zag; "Det kins se allebei drinke huur".

Ik veróntschöldigde mich met 'ne roeje pieper en zag; "Sorry, ik werk pas sinds kort in de horeca".

Netuurlik had ik van te veure waat vakliteratuur mótte laeze, noow stónd ik veur paol !!

**Wiek, de vlegende kiep** van ós werkploog haet metein 'n paar spiekbreefkes opgehangen.

Zoeë zoog idderein achter de bar drek waat in 't glaas meus.

Taegeswoordig is de sortering groeët en veural gemix.

Weit geej was se in mós schödde beej de bestelling van:

**'n Dafje of 'ne rare, sneeuw witje, radler, gespritzter of 'ne diesel.**

Beej 'ne halfum, 'ne schuss of 'n pilske wis ik 't

waal, zón oen bin ik noow ouk weer neet.

De kinder hadde 't ouk veur 't óetzeuke maar sóms mós se emus teleur stelle,

b.v. as vader kump vraoge um 'ne **Fristie**.

Waat 'n vraag met vastelaovend, dao valle mich de zök van óet!

Intösse waar 't programma begónne en woort 't

meziékvolume steeds hoeëger gezatte.

Ik zal waal noeëts begriepde waarom meziek leuker is as dae loeihard steit.

Ut woort lastig um de bestellinge op te neme.

De kós nemus mier verstaon en we zien euvergestap op gebaretaal of play-backe.



D'r woeëne bes kloke minse in **Holt Blieërik** die dao 'n oplossing veur hadde bedach.

Eine **net geschmienkte knöl** had veur ziene groep de meis gevraagde drenkskes op d'n erm geschreve

en hoofde allein maar aan te wieze waat 't meus zien en 't aantal vingers daobeej op te staeke.

Det werkde nao 2 kier al op afstand, dan kins se ouk mekkelik veurkroëpe.

'ne Andere **kloke groepsbesteller** goof zien beejgewerk kladblaedje iddere kier

aan dezelfde barman- of vrouw en hoofde vaerder niks te zegge, wie simpel kin 't zien.

Praote had ouk genne zin, want de volumeknoep stónd haos op 10.

Meschiens vele daorum de flesse 3 kier spontaan óet de volle ieskas.....?

'ne **Leuk verkleide viertigger** bestelde zich bekans elk

keteer 'ne **radler**, ge weit waal dae mix van beer en meestal citroenlimonade.

Hae bleef de gansen aovend aan de bar staon en goof zelf de maot aan van 't beer.

Nao 'n paar oor kósse aan zien ouge zeen det zien tesse vol ware.

Hae kós zich gelökkig aan de bar vashalde, maar good ouk!

We hebbe flink gepaez, ouk gezweit en vuuel gelache, we



hadde 'n gezellige ploog.

Jaomer det d'r neet mier **Rapidoleeje** 'n paar eurkes **met** wille **hjelpe** um de clubkas te spekke.

Tenslotte haet idder lid dao plezeer van, **meschiens 't volgend jaar!**



Dink d'r ens euver.....

Elly van Elswijk

## Commentaren

Poerkerzaoterdaag door Guest op 21-02-2013 om 15:59

Det is bes ein leuk stökske wat se hes geschreve, Elly.

En 't klop auk wat se zaes; as d'r nog inkele minse mier meidoon dan wuurt 't nog leuker.  
groetjes, Theo S